

Govor članice Izaslanstva Parlamentarne skupštine BiH u Parlamentarnoj skupštini Vijeća Europe Ljiljane Milićević na redovitom zasjedanju PS Vijeća Europe

Strazbur, 29. lipanj 2006.

"Gospodine predsjedavajući, dame i gospode

Moje današnje obraćanje Parlamentarnoj skupštini Savjeta Evrope odražava predhodno zauzete stavove predstavnika srpskog naroda u procesu usvajanja ustavnih promjena u Bosni i Hercegovini. Pritom moram istaknuti činjenicu da je od 12 predstavnika srpskog naroda u Parlamentu BiH, za predložene ustavne promjene glasalo njih 11, što najbolje odražava spremnost srpskog naroda na iznalaženju rješenja prihvatljivog za sve.

Sušтина stavova srpskih predstavnika u ovom procesu svodi se na sljedeće:

Bosna i Hercegovina mora prioritetno sačuvati stabilnost i mir koji su najznačajniji rezultati Dejtonskog mirovnog sporazuma. Povjerenje i lojalnost državi građana iz sva tri konstitutivna naroda direktno zavisi od učešća u upravljanju državom njihovih izabranih predstavnika.

Lojalnost državi rezultat je povjerenja u nju: povjerenje u državu proizilazi iz vjere u njenu sposobnost da zaštiti i pojedince i snažne kolektivne nacionalne identitete tri konstitutivna naroda; vjera u državu postoji samo ako izabrani predstavnici svakog od konstitutivnih naroda imaju ustavom definisano pravo i obavezu da paritetno upravljaju državom.

Da bi Bosna i Hercegovina mogla da se razvija kao država koja obezbjeđuje prosperite svojim građanima, njena ustavna utemeljenost Dejtonskim mirovnim sporazumom treba se nadograđivati poboljšanjem ustavnih rješenja kroz proces evolutivno, sa ciljem nadogradnje ključnih državnih institucija radi povećanja njihove efikasnosti i odgovornosti, voditi računa da se održi uznapredovana strateška stabilnost društva i ne stvaraju nove međunacionalne tenzije.

Svaka od tri ključne institucije države, Predsjedništvo, Parlament i Savjet ministara mora biti ustavno izgrađena u mjeri i obimu koji obezbjeđuje dva ključna zadatka najvažnija za budućnost države:

- Stabilnost države kroz povjerenje i lojalnost građana iz reda sva tri konstitutivna naroda preko njihove zagarantovane paritetne zastupljenosti u ovim institucijama kroz izabrane predstavnike sa mehanizmima ustavne zaštite prava i interesa konstitutivnih naroda u odlučivanju i izboru
- Funkcionalnost države kroz organizaciju ovih institucija koja garantuje sposobnost za nesmetano funkcionisanje i preuzimanje i izvršavanje međunarodnih i domaćih obaveza kroz regionalne i globalne predintegracione i postintegracione procese.

Iz svega predhodno proizilazi odnos prema mogućim promjenama Ustava, determinisan prije svega namjerom da se državne institucije učine efikasnijim i odgovornijim što neće ugroziti temeljnu entitetsku ustavnu strukturu države uz istovremeno očuvanje temeljnih ustavnih vrijednosti iz Dejtona, koje su donijele mir i stabilnost, vodeći računa da su za dugoročnu stabilnost BiH najvažniji harmonični odnosi između tri snažna kolektivna nacionalna identiteta.

Ukoliko današnja Rezolucija bude usvojena, ništa od predhodne pobrojanog neće biti ostvarljivo, a sav postignuti napredak će jednim potezom biti anuliran.

Na kraju vas, dame i gospodo, moram podsjetiti da je Dejtonski mirovni sporazum po svojoj pravnoj prirodi međunarodni ugovor, te da se kao takav, ima svoje potpisnike, garante i Upravni odbor za implemenatciju, čije su članice pored SAD i 15 zemalja članica Savjeta Evrope a da predložena Rezolucija otvara pitanje hijerarhijskog pravnog, pa i političkog odnosa pobrojanih činilaca. Podsjećam vas dame i gospodo da vaše današnje učešće u izglasavanju ove i ovakve Rezolucije, istovremeno znači i preuzimanje dijela odgovornosti za sve posljedice koje iz rezolucije mogu proizaći za Bosnu i Hercegovinu. Za vas je to čin izražavanja političkog mišljenja a za narode Bosne i Hercegovine pitanje od životne važnosti.

U nadi da ćete na osnovu slike kreirane posmatranjem stvari iz jednog ugla koje je stvorena ovom Rezolucijom i diskusija koje smo u prilici čuti danas, razumjeti

ozbiljnost problema, ranjivost teško stečene stabilnosti u Bosni i Hercegovini nanovo izgrađenog međusobnog povjerenja, molim vas da o ovom dokumentu danas ne glasamo, te da ga vratimo Komitetu na doradu. Naredno zasjedanje bi bilo dobra prilika da nakon provedenih izbora, razgovaramo ponovo o situaciji u Bosni i Hercegovini.

Hvala na pažnji." (kraj)